


Éxito rotundo da MARCHA POLO PECHÉ DA CELULOSA EN PONTEVEDRA



O pasado día 19 de xuño, máis de 6000 persoas confluiron diante da factoría da Celulosa nunha marcha que partiu simultaneamente desde as Alamedas de Marin e Pontevedra e que tiña como finalidade reclamar o peche definitivo do complexo contaminante de ENCE-ELNOSA. Fontes da APDR sinalaron o salto cualitativo que supón na loita contra

o complexo ENCE-ELNOSA a presenza directa e activa de pescadores, mariscadores, bateiros e outros traballadores da Ria, que acudiron con perto dun cento de embarcacións. Un desorbitado e inxustificado despregue policial non impediu que a marcha cobrase un espírito absolutamente pacífico, sereo e até festivo, con varios grupos de gaiteiros amenizando o longo percorrido. A masiva resposta cidadán deixou ben ás claras a forte incidencia que están a ter na consciencia da xente os últimos episodios do longo "affaire" da Celulosa pontevedresa, comezando pola difusión dos datos do informe WEL que confirman o seu carácter altamente contaminante. Por se non abundase, produciuse un escape de mercaptanos (aunque se creu nun primeiro intre que podía ser de cloro) na noite do 24 de maio, que provocou unha alarma social inusitada, coas centralitas das emisoras de rádio colapsadas polos cidadáns afectados por picores e moléstias respiratorias. Este escape e a indignación cidadán que seguiu, forzaron seguramente a que o conselleiro Cuiña iniciase expediente sanciona-

dor contra ELNOSA e apercebise a ENCE sobre os graus de contaminación que provocaba. O conselleiro Cuiña, ademais, tivo que desmentir ao conselleiro Couceiro, quen falara maravillas da factoría no aspecto medioambiental uns días antes. Estas noticias e declaracións caldearon máis o ambiente. Pola súa banda o BNG apresentou unha moción no Concello pontevedrés solicitando o peche da factoría e a elaboración dun plano para a recolocación dos traballadores. PP e PSOE rexeitaron a moción e decidiron crear unha Comisión para que se investigue o escape do día 24 de maio. A presidenta da APDR, Leonor Álvarez "Nené", resumiu o espírito dos milleiros de manifestantes declarando: "oxalá sexa esta a derradeira marcha contra a celulosa".



MANIFESTACIÓN EN LUGO CONTRA O ENCORO DE NAVIA

Mais de 3000 persoas asistiron en Lugo a manifestación convocada pola coordinadora antiencoros do Navia, o psado 5 de xuño, Día Mundial do Meio Ambiente. O ambiente festivo non anulou, porén, a preocupación que os navegos e navegas teñen pola construción deste emcoro, decidida en Madrid, como nos tempos dourados da onda

asulagadora que sementou Galiza de lagos artificiais. A manifestación foi unha auténtica retrospectiva no tempo, desfilando ás pancartas das sucesivas Coordinadoras contra o emcoro de Navia dos anos 1975 e 1985, ademais da actual. Outras se terán perdido na memoria, havidá conta do prolongado expediente que data do ano 1951. A cita acudiu todo Navia, grandes e pequenos, convertindo-a quizá nunha das manifestacións deste tipo mais interxeneracional que se teña celebrado. A asistencia do resto do país foi tamén numerosa, a pesar das convocatorias existentes noutras localidades con motivo do Día Mundial do Meio Ambiente. Confiamos en que a manifesta opo-

sición de todo o povo de Navia á cosntrucción deste emcoro, mantida ao longo de tanto tempo, así como o rexeitamento unánime do emcoro polo Parlamento Galego, e as sucesivas actividades reivindicativas que están a ter lugar durante todo o verán en Navia, fagan recapacitar ao Goberno Central e dé marcha atrás de forma definitiva de tal pretensión.

Tamén afectados pola política hidrolóxica do goberno central, unha representación da coordinadora pola conservación do río Arenteiro estivo presente para denunciar o impacto ambiental das numerosas minicentrales que se pretenden instalar na zona.

